



Na osnovu člana 2.9 stav (1) tačka 11, člana 2.10, a u vezi s članom 1.3 i 14.1 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14 i 31/16) i člana 80. Pravilnika o načinu provođenja izbora u Bosni i Hercegovini ("Službeni glasnik BiH", br. 32/16 i 43/16), **odlučujući u ponovnom postupku**, Centralna izborna komisija Bosne i Hercegovine je na 4. sjednici, održanoj 26.01.2017. godine, donijela

ODLUKU

(1) Poništavaju se izbori u izbornoj jedinici Stolac provedeni na dan 02.10.2016. godine za Općinsko vijeće Stolac i načelnika Općine Stolac na svim redovnim biračkim mjestima, te glasanje putem mobilnih timova, kao i glasanje u odsustvu i glasanje putem pošte, kako slijedi:

- a) na biračkim mjestima 176A001, 176A002, 176A003, 176A004, 176A005, 176A006, 176A007, 176A008, 176A009, 176A010, 176A011, 176A012, 176A013, 176A014, 176A015, 176A016, 176A017, 176A018, 176A019,
- b) biračkom mjestu za glasanje nepotvrđenim-kovetiranim glasačkim listićima 176ANNN,
- c) glasanja putem mobilnih timova 1, 2, 3. i 4,
- d) glasanja putem mobilnih timova iz drugih osnovnih izbornih jedinica za osnovnu izbornu jedinicu Stolac 093AMT3, 173AMT1 i 166BMT1,
- e) glasanja birača u odsustvu iz drugih osnovnih izbornih jedinica za osnovnu izbornu jedinicu Stolac 126A501, 157A501, 173A501, 177B501NNN, 179B501NNN i 182B501,
- f) glasanja birača registrovanih za glasanje putem pošte.

(2) Odluku o raspisivanju i održavanju ponovnih izbora Centralna izborna komisija Bosne i Hercegovine će donijeti nakon pravosnažnosti ove odluke, u roku utvrđenom u članu 14.1 Izbornog zakona Bosne i Hercegovine.

Obrazloženje

Centralna izborna komisija Bosne i Hercegovine je donijela odluku broj: 05-1-07-5-4/17 od 12.01.2017. godine o poništenju izbora u izbornoj jedinici Stolac za Općinsko vijeće Stolac i načelnika Općine Stolac, na koju je politička stranka Socijal demokratski front BiH uložila žalbu Apelacionom odjelu Suda Bosne i Hercegovine.

Rješenjem Suda Bosne i Hercegovine broj: S1 3 Iž 024266 17 Iž od 24.01.2017. godine uvažena je žalba političke stranke Socijal demokratski front BiH i ukinuta odluka Centralne izborne komisije Bosne i Hercegovine broj: 05-1-07-5-4/17 od 12.01.2017. godine i predmet vraćen Centralnoj izbornoj komisiji Bosne i Hercegovine na ponovni postupak i odlučivanje, sa uputom da Centralna izborna komisija BiH u ponovnom postupku u svemu postupi u skladu sa primjedbama i uputama Suda Bosne i Hercegovine.

Postupajući po službenoj dužnosti i po uputama Suda Bosne i Hercegovine, Centralna izborna komisija BiH je poništila izbore u izbornoj jedinici Stolac za Općinsko vijeće Stolac i načelnika Općine Stolac, na 19 redovnih biračkih mjesta, na jednom biračkom mjestu za glasanje nepotvrđenim-kovetiranim glasačkim listićima 176ANNN, glasanje putem četiri mobilna tima, glasanje putem tri mobilna tima iz drugih osnovnih izbornih jedinica za osnovnu izbornu jedinicu Stolac, glasanje birača u odsustvu iz šest drugih osnovnih izbornih jedinica za osnovnu izbornu jedinicu Stolac i glasanje putem pošte.

U postupku koji je prethodio donošenju ove odluke, Centralna izborna komisija BiH je utvrdila:

Općinska izborna komisija Stolac je dana 03.10.2016. godine dostavila Centralnoj izbornoj komisiji Bosne i Hercegovine izvještaj o vanrednim događanjima na izborni dan 02.10.2016. godine u izbornoj jedinici Stolac. U predmetnom izvještaju je, pored ostalog, navedeno:

- a) da na biračkim mjestima 176A001, 176A002, 176A003, 176A004, 176A005, 176A006, 176A007, 176A008, 176A009, 176A012, 176A013, 176A014, 176A015, 176A016, 176A017, 176A018, 176A019 je izborni proces prekinut prije zakonom utvrđenog vremena i nije završen radi nepravilnosti na ovim biračkim mjestima učinjenim od pojedinih članova biračkih odbora i aktivnosti kandidata i predstavnika pojedinih političkih subjekata kojim su ometali i opstruirali izborni proces, te da je za Mobilni tim 1. i Mobilni tim 4. nepoznata sudbina izbornog materijala,
- b) da je Mobilni tim 2. uredno razdužio izborni materijal u sjedištu Općinske izborne komisije Stolac,
- c) da je izborni materijal Mobilnog tima 3. kod predsjednika ovog mobilnog tima, jer ga nije mogao predati u sjedište Općinske izborne komisije Stolac,
- d) da je biračko mjesto 176A010 bilo otvoreno u 11,24 sata, a zatvoreno u 23,30 sati uz konstataciju da su Ivan Perić, predsjednik Općinske izborne komisije Stolac i Avdo Jaganjac, član ove komisije, došli na ovo biračko mjesto kako bi pojasnili pojedinačne uloge i zaduženja svakog od članova biračkog odbora; da su dva člana biračkog odbora razriješena ove dužnosti odlukom Općinske izborne komisije Stolac glasanjem dva člana ove komisije; da Općinska izborna komisija Stolac ne može sa sigurnošću tvrditi da li je izborni proces završen u skladu sa zakonom i da se stvarno stanje u tom pogledu može dati nakon uvida u materijal koji je u momentu sačinjavanja izvještaja bio u zgradi Općine Stolac pod zaštitom policije i
- e) da je biračko mjesto 176A011 bilo otvoreno do 19,00 sati, gdje su bila prisutna tri člana, ali izborni proces nije završen po izbornim pravilima, jer su dva člana biračkog odbora u 15,30 sati napustila biračko mjesto.

Općinska izborna komisija Stolac je dana 06.10.2016. godine dostavila Centralnoj izbornoj komisiji Bosne i Hercegovine Zapisnik sa sjednice od 06.10.2016. godine, potpisan od predsjednika i jednog člana ove komisije, a koji su i prisustvovali sjednici. U ovom zapisniku je navedeno da su za biračko mjesto 176A010 dostavljeni svi materijali i da je izborni proces validno okončan, kao i za Mobilni tim 2, a dana 09.10.2016. godine jedan član Općinske izborne komisije Stolac je dostavio Centralnoj izbornoj komisiji Bosne i Hercegovine primjedbe na navedeni Zapisnik sa sjednice od 06.10.2016. godine u odnosu na validnost izbornog procesa na ovom biračkom mjestu.

Odredbom člana 5.9 stav (1) Izbornog zakona Bosne i Hercegovine, pored ostalog, utvrđeno je da glasanje traje neprekidno u toku dana, sa početkom u 7.00 sati i završetkom u 19.00 sati, a stavom (3) ovog člana da ako je prekid trajao duže od tri sata, o dužini perioda za koji se glasanje produžava odlučuje općinska izborna komisija.

Odredbom člana 5.26 stav (1) Izbornog zakona Bosne i Hercegovine je propisano da nakon utvrđivanja rezultata glasanja, birački odbor odmah, a najkasnije 12 sati nakon zatvaranja biračkog mjesta, dostavlja nadležnoj općinskoj izbornoj komisiji zapisnik o radu biračkog odbora, izvod iz Centralnog biračkog spiska, sve posebne obrasce iz člana 5.18 ovog Zakona, sve nepotvrđene glasačke listiće, važeće glasačke listiće, nevažeće glasačke listiće, te odvojeno neiskorištene i upropaštene glasačke listiće, kao i sve druge obrasce koje zahtijeva Centralna izborna komisija BiH. Predsjednik biračkog odbora zadržava primjerak izvještaja o rezultatima glasanja.

Odredbom člana 5.27 stav (1) Izbornog zakona Bosne i Hercegovine pored ostalog, utvrđeno je da nakon što od biračkih odbora dobije svu dokumentaciju i materijale za izbore, općinska izborna komisija utvrđuje objedinjene zbirne rezultate glasanja provedenog na teritoriji te općine za organe na svim nivoima vlasti za koje su provedeni izbori i o tome sastavlja zapisnik, koji se podnosi Centralnoj izbornoj komisiji BiH u roku od 24 sata nakon zatvaranja biračkih mjesta. Objedinjeni zbirni rezultati glasanja za općinu sadrže iste podatke prema članu 5.25 ovog Zakona.

Na osnovu naprijed navedenog, a ocjenom svih činjenica pojedinačno i u njihovoj međusobnoj povezanosti, Centralna izborna komisija Bosne i Hercegovine je utvrdila da se postupak glasanja na redovnim biračkim mjestima 176A001, 176A002, 176A003, 176A004, 176A005, 176A006, 176A007, 176A008, 176A009, 176A010, 176A011, 176A012, 176A013, 176A014, 176A015, 176A016, 176A017, 176A018, 176A019, Mobilni tim 1, Mobilni tim 3. i Mobilni tim 4, te biračkom mjestu za glasanje nepotvrđenim-kovertiranim glasačkim listićima 176ANNN za izbornu jedinicu Stolac nije ni odvijao niti završio u skladu sa odredbama Izbornog zakona Bosne i Hercegovine i Pravilnika o načinu provođenja izbora u Bosni i Hercegovini, odnosno Općinska izborna komisija Stolac nije u posjedu izbornog materijala, što je suprotno odredbi člana 5.26 stav (1) Izbornog zakona Bosne i Hercegovine.

Imajući u vidu činjenicu da su kandidatske liste za načelnika i općinsko vijeće u osnovnoj izbornoj jedinici Stolac izmijenjene na osnovu pravosnažnih odluka Centralne izborne komisije BiH, Centralna izborna komisija Bosne i Hercegovine je, iako su pravilno provedene procedure propisane Izbornim zakonom BiH i podzakonskim aktima, postupajući po nalogu Suda Bosne i Hercegovine, poništila glasanje birača koji su glasali: putem Mobilnog tima 2, putem mobilnih timova iz drugih osnovnih izbornih jedinica za osnovnu izbornu jedinicu Stolac, u odsustvu iz drugih osnovnih izbornih jedinica za osnovnu izbornu jedinicu Stolac i putem pošte, kako bi se ovim biračima omogućilo da ponovno glasaju na ponovnim izborima u osnovnoj izbornoj jedinici Stolac, kako bi dali svoj glas nekom od preostalih kandidata na kandidatskim listama. Na ovaj način Centralna izborna komisija BiH je, u skladu sa članom 1.3 Izbornog zakona Bosne i Hercegovine, omogućila jednako biračko pravo svim biračima upisanim u Centralni birački spisak za osnovnu izbornu jedinicu Stolac za ponovno glasanje na ponovnim izborima za organe vlasti u ovoj općini, čime je u cijelosti postupila po uputama Suda Bosne i Hercegovine.

Na osnovu naprijed navedenog, Centralna izborna komisija Bosne i Hercegovine je odlučila kao u dispozitivu ove odluke.

PRAVNA POUKA: Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objave ove odluke na web stranici Centralne izborne komisije Bosne i Hercegovine. (Rok ističe u 24,00 sata dana 28.01.2017. godine).

Žalba se podnosi putem Centralne izborne komisije Bosne i Hercegovine neposredno u sjedištu Centralne izborne komisije Bosne i Hercegovine, Ulica Danijela Ozma broj 7 Sarajevo ili putem faks aparata na broj 033/251-329 ili 033/251-307.

Broj : 05-1-07-1- 4/17
Sarajevo, 26.01.2017. godine

Dostavljeno:

- političkim subjektima koji su učestvovali na Lokalnim izborima 2016. godine
- za Općinsko vijeće Stolac i načelnika Općine Stolac
- a/a



Predsjednica

Dr. Irena Hadžiabdić